



Georgius in Saxonía honestis parentibus natus est. Is cum feliciter prima artium & linguarum fundamenta iecisset, sese hinc inde ad Academiás contulit, & Theologiæ potissimum operam impendit. Itaque factum ut in ea plurimum profecerit, & inter primarios Theologos suo tempore connumeratus fuerit. Ad hanc eruditionem uitæ innocentiam, pietatis amorem, & raram facundiam adiunxerat. Id cum Fridericus Elector Saxoniae cognouisset, eum in suam curiam uocauit, & aulicorum Ecclesiasten constituit. Eam functionem is magna diligentia obiuit, & homines ad coelestem beatitudinem perducere uerbo Dei conatus fuit. Erasmo

quoque Roterodamo semper ob eruditionem familiaris extitit. Eo autem tempore 1517 Lutherus pontificis indulgentias carpere coepit, atque eius rei causam Spalatinus apperuit. Cum etiam sequenti anno coram Caietano cardinali Augustae compareret, Spalatinus interfuit, & totam eam actionem in literas retulit. Inde paulatim Luthero amicus factus, quandoque Aldenburgi in sua habitatione cum eo de religione contulit, & tandem Luthero subscripsit. Itaque Elector Saxonicus hunc Spalatinum ob rerum peritiam & animi moderationem multoties secum ad comitia Imperij perduxit, atque hunc aduersarijs respondere iussit. id quod ille potissimum 1526 Spiræ, & 1530 Augustae praestitit. hoc modo factum ut Spalatinus ob uirtutes magnam sibi existimationem conciliarit. Eras. in Epist. Sleid. Lud. Rab. in Luthero.